

**Ethica Symbolica E Fabularum Umbris In Veritatis Lucem  
Varia Ervditione Noviter evoluta**

**Pexenfelder, Michael**

**Monachii, 1675**

Ethicè.

---

[urn:nbn:de:hbz:466:1-68709](#)

## SYMBOLVM XLV.

Nifus Rex in avem haliætum: Scylla filia pariter  
in cirin volucrem vertitur.

8. Metamorph.

## Ethicè.

1. Mulieri secretum non committendum. 2. Prodictionis detesta-  
tio.

**R**Ex oppidi Megaræ & vicinæ regiunculae erat Nifus opibus & civitate  
abs se exstructa, Nisaque appellatâ, sat felix, si Scyllam filiam non  
habuisset. Cùm enim Minos Jovis & Europæ filius, Cretæ Rex,  
Atheniensibus ob filii Androgeo necem (de quo in Theseo egimus) bellum  
inferret, antequam ipsam urbem Atticam obsideret, statuit vicina expugna-  
re oppida, initio à Megarenibus factô. Quam civitatem cùm Minos ar-  
cta obsidione premeret, vix tamen spes esset illius potiundæ, evénit, ut  
Scylla, Nisi regis filia, curiositate speculandi exercitûs, Cretici, præaltam  
mурorum turrim conscenderet, ipsúmque regem Minoëm mœnibus obe-  
quitantem contemplaretur accuratiūs, quām egregiè pudicam deceret.  
Cúmque hoc ficeret frequentiūs, ex fumo, ut dicitur, in flammam, ex  
aspectu in amorem incidit. Et mox exarsit adeò, ut ad viam cupiditatibus  
suis muniendam, constituerit patriam hosti prodere. Cæterūm non igna-  
ra, purpureo Nisi parentis crine Patriæ fatum, & totius civitatis salutem  
contineri, quæ capi minimè possit, illo non resecto; de nocte patrem non  
observata aggreditur, dormienti crinem fatalem abscindit, & cum præda  
per medios hostes ad regem tendit, habere se, quæ ad magnam ipsius felici-  
tatem pertineant. Benignè admittitur, illecebras orditur à salutatione  
blandissima, causam accessus exponit, simûlque crinem, & cum eo civita-  
tem, caputque parentis prodit. Minos, qua erat mentis generositate, mu-  
lieris improbitatem aversatur, parùm sibi decorum existimans, hostile op-  
pidum non vi, sed proditione muliebri capere, qui in armis & virtute  
omnia ponebat; jubet ex oculis facessere flagitium, additis diris in caput  
scelestum execrationibus. Neque segniùs instituti belli rationes perse-  
quuntur; donec oppido tandem, arcéque potitus, sui juris utrumque fecit,  
legibüsque captivæ civitati impositis, retro in Cretam vela vertit. Scylla  
se

H k 3



se desertam, contemptamque videns, & omnibus insuper exosam, amissa patria, calcato omni decore ac honestate, profligata pudicitia, eò demum redacta est insanæ, ut victoris classem secutura, se in mare præcipitem daret. Quam inter undas fluctuantem, & jam carinârum extremam prensantem, conspicatus Nîsus pater, qui paulo ante mutatus fuerat, in halieatum (ex genere aquilarum vel accipitrum, vulgo falconem) aduncis impedit unguibus, iratoque rostro. Scylla metuens sibi ab infestante volvere, retrahit manus à navigio, & aura sibeleante, subitas induit plumas, inque avem, cirin nomine (ἀρτον κείγειν, à tondendo appellatam) transformatur, quam quidam ataudam seu cassitam esse arbitrantur, quod commam acuminatam velut galeata in capite gerat, patri scilicet defectam.

### Ethica.

I. (a) Primum documentum. Purpureus atque fatalis *Nîs* crinis significat, arcana regum & sanctiora consilia non evulganda, præsertim feminis. Etiam Samson in crinibus vires, oculos, libertatem, vitam habebat, sed omnia perdidit, quia secretum suum auribus Dalilæ commisit. Pulcherrimorum consiliorum frustrations, & foedi rerum exitus secretorum evulgationi adscribendi sunt. Infrimori sexui si quid arcani credas, id in vas pertusum te immisisse putas, per mille rimas effluet. Admiranda fuit in Papyrio, puero etiamnum prætextato, taciturnitatis observatio; qui etiam matrem sollicitantem, quid in Senatu fuisset actum (nam ei in curiam cum parente intrare licebat) rara silentii fide in ætate tam tenera, decretrum ignaram esse voluit, uti scribit Gellius lib. I. c. 23. Taciturnitas, inquit Scribanus c. 15. in Politico-Christianæ, est optimum ac tutissimum administrandarum rerum vinculum. Arcana consilia PP. Conscriptorum Romæ multis annis nemo senator evulgavit. At nescio quomodo his moribus, aut nocturnæ uxorum blanditiæ, aut imprudens filiorum ac parentum amor, aut amicitiae necessitudo, aut domesticorum fiducia, occultanda extorqueant. Idem cap. 27. Jam in servorum multitudine magna atria observantium, quis celet omnia? & quod secretum spores mulieri creditum? nullis propè tenetur secreti legibus mulier: prærogativa huius sexus est, nunquam, nusquam silere. Vulgari amat, & ut videri, sic atri; & secretissimum suum inimicæ aperiet, si desit amica, si socia, si conubernalis, quæ nunquam mulieri defuit. Quid? quod voluptatis suæ, adeoque & libertatis magnam partem putet, si quod concreditum ipsi, in-

(a) *Mulieri secretum non committendum.*

genua



genua quadam libertate in amicæ profundat sinum. Et certè, quisquis rem mulieri commisit, vulgari voluit; nec certior alia evulgandi ratio, quām vel unitus plerumque mulieris fidei rem committere, maximè si se-cretum pæctus fueris: quò enim & tu sanctiùs imperaveris, & sanctiùs illa spoponderit, hoc avidiùs in narrationem properabit; imò & provolabit. Neque enim satis illi ivisse est, volare vult. Alas addidit narrandi concre-dita desiderium. Addidit & timor: vereri enim credas disrumpendam, si diutiùs hoc è recenti torculari mustum pectoribus stringat. Ne mirere: servitutis enim quoddam genus esse putat, non posse loqui; libertatis, posse. Et quis vir hic accuset mulierem? si silere ipse non potuit, cur secre-tum à muliere sperat? in criminis paritate, nōnne maius primum manet auctorem? vult secretum suum vir? imperet linguae: laxavit? ne da-mnet mulierem, cuius omnis sapientia in ore est. Hæc vir ille doctissimus. Magno suò malo Nisus didicit, purpureum feminæ, & quidem puellæ se cri-nem detexisse. Rex fuit; diadema caput cinxit; regnum ipsum eā fasciâ protexisset. Si capillos eā involvere cautiùs voluisset.

IL. (b) Minos insignem justitiam, etiam inferorum iudex constitu-tus, animi sui generositatem & celstudinem hīc quoque luculentè exeruit; nam perfidiam feminæ dūm abominatur, virum se ostendit fortē, & im-peratorem strenuum. Non fraude, nec proditionibus oppugnandus est hostis, sed armis & virtute. Alexander certè magnus tantum absuit ab his fallendi artibus, ut Ducibus suis dicentibus, Persas intempesta nocte appri-mendos videri, responderit, latrunculorum & furum istam esse solertiam; sibi gloriam in consilio habenti, Darium palam luce aggredi certum esse. Curt. lib. 4. Egregium facinus M. Furii Camilli describit Livius Dec. 1. lib. 5. Ad quem Falerios urbem obsidentem pædagogus ( seu ludimagister ) optimatum filios ludibundos in castra perduxerat, ut civitatem Camillo proderet. At is denudatum proditorem, vinctis post tergum manibus, pueris verberandum, & Falerios reducendum tradidit; eaque humanitate & fide Faliscorum omnium animos, & ipsam etiam urbem deditione oc-cupavit. Sic Timocharem Pyrrhi Epirotarum regis medicum, prodito-rem, Fabritius consul respuit, cum dicto: Urbem à filio Martis conditam, armis bella, non veneno gerere. Valer. Max. lib. 6. de Justit. & Tiberius Imp. Catto euidam Ariminum, præcipuum Germanorum decus & Ducem, promittenti veneno necaturum, respondit: non fraude, nec occultis insidijs, sed palam & armatum populum Rom. hostes suos ulcisci sole-re. Tacit lib. 2. annal. Rectissimè Curtius lib. 5. Falli eos vehemen-ter,

(b) Perfidia ac proditionis detestatio.

ter, qui prodigionis præmia sperent, aut exspectent. Nam et si vulgo dicatur: prodigionem ab hostibus amari; proditores non laudari; Minos tamen justissimus neutrum probavit. Nota est historia de Tarpeia, virginе Romana, quæ Sabinis hostibus Capitolium, arcem Romanam, prædidit, præmium pæcta quidquid sinistris manibus haberent: aureas vero tunc armillas brachijs gestabant. Accepti in arcem, in sceleris mercedem, pro aureis donis clypeos, quos lœvâ ferebant, certatim in eam conjecterunt, & necarunt. Livius. Ita contigit Scyllæ, quæ ut Pausanias refert in Corinthiacis, navi secuta Minoëm pro regij matrimonij societate, turpem ac infelicem, sequē dignum vitæ exitum invenit; quippe iussu regis præcipitata in undas, fluctibusque in littus expulsa, expers sepulturæ, pabulum obscoenis alitibus jacuit; inde fabulæ data occasio pennas ei & volatum affingenti.

## SYMBOLVM XLVI.

Paupertas hospitalis Philemonis & Baucidis,  
conjugum.

## 8. Metamorph.

## Ethicè.

1. Philemon & Baucis multarum virtutum exemplum.
2. Paupertas, probitatis magistra.
3. Paupertas læta.
4. Paupertas liberalis.
5. Remuneratio paupertatis beneficæ.

**F**Orte Jupiter comitante Mercurio, humana sub specie, terrarum peragrabat orbem; delatûsque in quoddam Phrygiæ oppidum, pernoctandi & hospitandi gratiam ab incolis rogabat. Exclusi sunt undique. Denique à Philemone & Baucide, grandævis simul ac pauperculis conjugibus, in agresti quadam casa, & tenui apparatu, neque enim aliter res ferebat domestica, excipiuntur. Anserem illi habebant unicum, & hunc ipsum hospitibus mactare parabant, nisi is volatu tardas ætate effugisset manus, præsidiumque apud Deos reperisset. Delectati tanta facilitate Divi, ut non immemores officij, sic neque injuriarum fese ostenderunt esse. Jubent in vicinum montem ascendere hospitatores suos,

&amp; ibi